

ՀԱՅԿԱԳԻՏԱԿԱՆ

ՀԱՅԱԳԻՏԱԿԱՆ

ՀԱՄԱԿԱՆ




ՊԷՅՐՈՒԹ 1977 - 1978

0826  
~~225~~

ՀՊՄ 237

ՀՐԱՏԱՐԱԿՈՒԹԻՒՆ ՀԱՅԿԱԶԵԱՆ ԳՈՒԼԷՃԻ ՀԱՅԱԳԻՏԱԿԱՆ ԱՄԲԻՈՆԻ



# ՀԱՅԿԱԶԵԱՆ ՀԱՅԱԳԻՏԱԿԱՆ ՄԱՍԻՆ

~~2387~~  
246


~~A 57617~~

ՀԱՏՈՐ Զ.

Խմբագիր

ԵՐՈՒԱՆԴ Զ. ՔԱՍՈՒՆԻ

ՊԷՅՐՈՒԹ, 1977



PUBLISHED BY THE ARMENIAN DEPARTMENT OF HAIGAZIAN COLLEGE

# HAIGAZIAN ARMENOLOGICAL REVIEW

VOLUME 6

EDITOR  
YERVANT H. KASSOUNY



BEIRUT, 1977

# Տիրատուր Կարդապետը

## Եւ Արա հանելուկները

Ա. Շ. ՄՆԱՑԱԿԱՆԵԱՆ

Հանելուկների ժանրը եւս հայ դրականութեան պատմութեան մէջ շատ հին ծագում ունի: Ակունքներն, անշուշտ, թաղուած են ժողովրդական բանահիւսութեան խորքերում: Գրաւոր դպրութիւնից յայտնի անդրանիկ հանելուկները կապում են Ե. դարի հեղինակ Դաւիթ փիլիսոփայի անուան հետ: Կան մի շարք հանելուկներ էլ, որոնք առնչում են է. դարի մտածող Անանիա Շիրակացու դրական ժառանգութեանը: Անվիճելի է «Սրախճանականք» կամ «Բախճանականք» խորագրով թուարանական հանելուկների՝ նոյն հեղինակին պատկանելու իրողութիւնը: Կան հին ժամանակների դերոշմ ունեցող այլ հանելուկներ եւս, որոնց հեղինակներն անյայտ են:

Այս աւանդների մեծագոյն զարգացնողն ու շարունակողը հանդիսացաւ ԺԲ. դարի պործիչ եւ բանաստեղծ Ներսէս Շնորհալին: Չնայած տալիս աղբիւրներից նրա անուամբ յայտնի հանելուկների քանակը հասնում է շուրջ հարիւր յիսուն միաւորի, սակայն ձեռագրային փաստերը մտածել են տալիս այդ թիւը կրկնապատկելու մասին:

Ներսէս Շնորհալին ինչպէս «Ողբ Եդեսիոյ», «Վիպասանութիւն», «Սրատք» եւ այլ ստեղծագործութիւններով, այնպէս էլ հանելուկներով ստեղծեց իր ուղղութիւնը: Նրանից յետոյ երեւան եկան մի շարք բանաստեղծներ (Յովհաննէս Ծործորեցի, Տիրատուր եւ այլն), որոնք հետեւելով Ներսէս Շնորհալուն, ստեղծեցին նորանոր հանելուկներ: Ուշագրաւն այն է, որ վերջիններս նախընտրեցին Ներսէս Շնորհալու մշակած քառեանների ձեւն ու կամրական եր-

կանդամ Տ-վանկանի ոտանաւորը: Դրան զուգահեռ չմոռացուեց նաև Դաւիթ փիլիսոփայի եւ նրա յաջորդների մշակած ուղղութիւնը, ուր իշխում է ազատ եւ անյանդ բանաստեղծութիւնը: Վերջինս երբեմն իրեն է ձգել ժողովրդական հանելուկների առանձին միւտորներ եւ հարստացել:

Միջնադարեան որոշ հեղինակներ ու գրիչներ, յաճախ միասին են ընդօրինակել նման հանելուկները տարբեր նմուշներ եւ ստեղծել խառն ու ընդարձակ շարքեր, իսկ յաճախ էլ՝ դրանք վերադրել Ներսէս Ծնորհալու: Այս եղանակով ստեղծուել են հանելուկների խայտարղէտ եւ բազմապիսի շարքեր: Դրանց մի մասը տպագրուած է տարբեր պարբերականներում եւ գրքերում, իսկ միւս մասը մնացել է անտիպ, ուր զգալի քանակ են կազմում նորայայտ նմուշները:

Ինչպէս երեւում է այս ամփոփ խօսքից, ի դէմս մեր գրաւոր դպրութեան էջերում եւ տպագիր աղբիւրներում ցրիւ եկած հին ու միջնադարեան հանելուկների, ունենք հայ բանաստեղծութեան մի մեծարժէք հարստութիւն, որն իր ամբողջութեամբ դեռեւս հաւաքուած, ուսումնասիրուած եւ հրատարակուած չէ:

Մեր նպատակն է եղել, ի մի բերել այդ բոլորը՝ գիտա-քըննական բնագրերով եւ ամփոփ ուսումնասիրութեամբ:

Այս անգամ այդ ընդհանուր աշխատանքից տպագրութեան ենք ներկայացնում Ներսէս Ծնորհալու յաջորդներից մէկի՝ Տիրատուր վարդապետի հանելուկները:

Մատենադրութեան մէջ քանիցս յիշուած է ոմն Տիրատուր վարդապետ՝ որպէս հանելուկների հեղինակ: Մեզ ծանօթ առաջին յիշատակութիւնը գտնւում է «Բազմավէպ» ամսագրում, ուր նրա անունով տպագրուած է հետեւեալ հանելուկը.

Հինգն ասացին զինք՝ մեզ նըման,  
Եւ ինգն ունի երկու բերան,  
Բազում իրաց է նա նըման,  
Կու մեռանի եւ է՛ կենդան (1):

Յաջորդ անգամ Տիրատուր վարդապետին հանդիպում ենք Ղ. Ալիշանի «Յուշիկք Հայրենեաց»ում, ուր յիշուած է, թէ նա իր հանելուկները գրել է Ներսէս Ծնորհալու հանելուկների հետեւու-

1. «Բազմավէպ», Վեներիկ, 1850, էջ 160: Այս հանելուկի պատասխանն է «լուսին» (նոյնը, էջ 224): «Բազմավէպ»ում այս եւ նման ուրիշ հանելուկները սակաւ առ սակաւ հրատարակ էր հանում Ղ. Ալիշանը՝ առանց իր անունը նշելու:

Թեամբ: Հեղինակի ասորած ժամանակն է համարուում ԺԴ. դարը (2):

Ղ. Ալիշանից յետոյ՝ Ղ. Յովնանեանն է, որ ծանօթ է եղել Տիրատուր վարդապետի հանելուկներին: Նա եւս Տիրատուր վարդապետին համարում է ԺԴ. դարի հեղինակ (3):

Ըստ Երեւոյթին նրանց օղտադործած հիմքը՝ վենետիկի Մխիթարեանների Մատենադարանում պահուող Թ. 244 «Ոսկեփորիկ» կոչուած ժողովածուն է, որ յետոյ նկարագրուեց Բ. Սարգիսեանի կազմած ձեռագրացուցակում: Այն համարուում է ԺԴ-ԺԵ. դարի ընդօրինակութիւնն եւ, ի շարս ուրիշ նիւթերի, բովանդակում է Տիրատուր վարդապետի հանելուկները: Բ. Սարգիսեանը մէջ է բերել այդ շարքի խորազիրը եւ առաջին հանելուկը:

«Տիեզերալոյս վարդապետին Տիւր[ատրոյ] ասացեալ հանելուկք իմաստ.

Ինքն է միայն 'ւ ընկեր չունի,  
Իւր գոյութիւնն յոյժ հրաշալի,  
Ըստ հնգից ի վեր'ւ ի վայր շարժի  
Եւ ըստ երկուց հաւասարի» (4):

Ուրիշ տեղեկութիւններ՝ հանելուկներ դրող Տիրատուր վարդապետի մասին տուալիր աղբիւրներին՝ մեզ յայտնի չեն: Ինչ վերաբերում է ձեռագիր աղբիւրներին, ապա ուշադրաւ են Մաշտոցի անուան Մատենադարանի Թ. Թ. 5118 եւ 3531 ձեռագրերը: Դրանցից առաջինում հեղինակը կոչուում է Տիաս վարդապետ, իսկ երկրորդում՝ Տիրատուր վարդապետ: Առաջինում հաւանաբար առկայ է «Տի» եւ «աս», սղուած բառերի միացումը, որոնք սկզբնապէս ներկայացրել են «Տիրատուր ասացեալ» դարձուածքը:

Տիրատուր վարդապետի մասին լրացուցիչ փաստեր չունենք: Եղած տեղեկութիւնները՝ նշուած շարքերի խորագրերն են, որոնցից անհամեմատ պերճախօս է վենետիկեան օրինակի խորազիրը. «Տիեզերալոյս վարդապետին Տիւր[ատրոյ] ասացեալ հանելուկք իմաստ.»: Այստեղից պարզուում է, որ Տիրատուր վարդապետը եղել է հռչակաւոր դործիչ, որին կոչել են «Տիեզերալոյս»: Միաժամա-

2. Ղ. Ալիշան, Յուշիկք Հայրենեաց Հայոց, Ա. հտր., վեներտիկ, 1870, էջ 124:

3. Ղ. Յովնանեան, Հետազօտութիւնք Նախնեաց Ռամկօրէնի Վրայ, Ա. հտր., վեներտիկ, 1897, էջ 61:

4. Բ. Սարգիսեան, Մայր Յուցակ Հայերէն Ձեռագրաց Մատենադարանին Մխիթարեանց ի վենետիկ, Բ. հտր., 1924, էջ 651:

նակ պարզում է նրա իմաստասիրական հակումը «հանելուկը իմաստ» դարձուածքի օղնութեամբ, ուր վերջին բառը դրուած է կրճատ ձեւով (այէտք է լինի «իմաստասիրականք»)։ Ղ. Ալիշանի եւ Ղ. Յովնանեանի նշումներն էլ, թէ նա ապրել է ԺԴ. դարում՝ աւելի քան կոնկրետացնում են Ժամանակի ու հեղինակի մասին եղած կցկտուր, բայց խօսուն տեղեկութիւնները։ Այն հանգամանքը, որ վենետիկի ձեռագիրն ընդօրինակուած է ԺԴ-ԺԵ. դարերում եւ բովանդակում է ԺԴ. դարից առաջ ապրած հեղինակների ստեղծագործութիւններ, նորից բաւարար հիմք է Տիրատուր վարդապետին փնտռելու ԺԴ. կամ աւելի ճիշտ՝ ԺԴ-ԺԴ. դարերում։

Արդ, ո՞վ է այդ Ժամանակ ապրած եւ գործած «Տիեզերալոյս Տիրատուր վարդապետը»։

Հ. Աճառեանն ի մի է խմբել իրեն յայտնի բոլոր միջնադարեան Տիրատուրներին եւ ստացել մի ընդարձակ շարք, ուր իշխող տեղը պատկանում է ԺԴ. դարին։ Չնայած մեծանուն դիտնականը զդուշութեամբ կողք-կողքի է բերել տարբեր աղբիւրներից հաւաքած Տիրատուր անունով յայտնի հեղինակներին եւ գործիչներին, սակայն յատուկ քննութեան դէպքում նրանց մի մասը կարող է նոյնանալ։ Այս առումով ճիշտ է վարուել Լ. Խաչիկեանը՝ իր հրատարակած ԺԴ. դարի հայերէն ձեռագրերի յիշատակարաններում հանդիպող եւ 1309-1349 թուականներին գործած Տիրատուրներին դիտելով որպէս մի անձնաւորութիւն (5)։

Այդ հաշիւների հիմքում ընկած է այն իրողութիւնը, որ նշուած Տիրատուրները, չնչին բացառութեամբ, յիշատակում են որպէս Գլաճորի եւ Հերմոնի վանքի ուսուցիչ-բարունապետեր, ուստի եւ ինքնաբերաբար նոյնացում որպէս մի հեղինակ։ Եւ քանի որ այդ Տիրատուր վարդապետը դարասկզբին արդէն հասունացած մտաւորական է եղել, ուստի նրա ծնունդը պիտի որոնել նախորդ դարի երկրորդ կէսում, որով եւ նա կը ներկայանայ որպէս ԺԴ-ԺԴ. դարերի գործիչ։

Առանձնայատուկ խնդիր համարելով առհասարակ յայտնի բոլոր Տիրատուրներին միմիանցից զատելու եւ մեզ հետաքրքրող Տիրատուրին աւելի քան յստակ պատկերացնելու ծանր եւ օգտակար

5. Լ. Խաչիկեան, ԺԴ. Դարի Հայերէն Ձեռագրերի Յիշատակարաններ, Երևան, 1950, էջ 754: Տես նաեւ՝ էջ 60, 174, 294, 303, 378: Նրան հետեւելով եւ նրա մշած փաստերը խօսեցնելով՝ Խնդրիմ ալպէս է մտեցել նաեւ Լ. Խաչիկեանը: Տես՝ Լ. Խաչիկեան, Գլաճորի Համալսարանը, Երևան, 1973, էջ 159-161:

դործը, մենք մեր ներկայ աշխատանքի կապակցութեամբ կը բաւարարուենք Լ. Պաշխիկեանի կողմից ուրուարդուած վարդապետի կերպարով, համոզուած լինելով, որ հենց նոյն անձնաւորութիւնն է նաեւ հանելուկների հեղինակը: Այսպէս մտածելու համար հիմք են տալիս հետեւեալ փաստերը.

ա) Հանելուկների հեղինակ Տիրատուր վարդապետի հանելուկների հին ընդօրինակութիւնը դանուելով Վենետիկի թ. 244 ձեռագրում, որն ընդօրինակուած է ԺԳ-ԺԵ. դարերում, նրան ժամանակով առնչում է Գլաձոր-Հերմոնի վանքից յայտնի Տիրատուր վարդապետի հետ:

բ) Վենետիկի այդ նոյն ձեռագրում Տիրայր վարդապետի հանելուկներն ունեն այսպիսի խորագիր. «Տիեզերալոյս վարդապետին Տիր[ատուր] ասացեալ...»: Այսպէս են խորագրուած նաեւ Գլաձորի եւ Հերմոնի ուսուցչապետ Տիրատուրի քարոզները՝ «Տիեզերալոյս վարդապետին Տիրատուր ի բան Աւետարանին...» (6), կամ՝ «Տիեզերալոյս վարդապետին Տիրատուր արարեալ» (7):

գ) Տիրատուր վարդապետը կոչուած է նաեւ իմաստասէր. նրա քարոզներում նկատուած է իմաստասիրական խորք ու ոճ: Այդ հանգամանքը եւս նշուած է հանելուկների հին ընդօրինակութեան խորագրում. «... հանելուկը իմաստ» (այսինքն՝ «իմաստասիրականք»): Յիրաւի, այնտեղ կան այս առումով ուշադրաւ նմուշներ: Օրինակ.

Զգալեացս ամէնն է պիտանի  
 Իւրաքանչիւր որքան տանի,  
 Բայց հակընդդէմ սոցա լինի,  
 Տեսակն յառաջ քան զնիւթ կազմի:

Կան ուրիշ փաստեր եւս, որոնք իրենց ամբողջութեամբ պէթ առայժմ համոզում են, թէ հանելուկների հեղինակ Տիրատուր վարդապետը՝ Եսայի Նչեցու ժամանակակից ու պաշտօնակից Տիրատուր վարդապետն է (8):

6. Զեռ. թ. 2178, քերթ 286 ք:

7. Նոյնը՝ քերթ 307 ա:

8. Այս Տիրատուրի մասին պակասուած է հետեւեալ գրոյցը. «ԸԳՏիրատուր վարդապետն օր մի ի պաշտօն տարին, երբոր պատարագն արձակեցաւ, մոռացան տանել հաց մտա: Երբոր երեկոյ եղիւ բերին զմա ի տուն եւ եղին յառաջն մորա սեղան, ասաց իշխանն, քէ՛ Քանի՞ տարոյ մարդ ես, վարդապետ: Ասաց վարդապետն, քէ՛ Քառասուն տարուն մէկ օր պակաս: Ասէ իշխանն. Ընդէ՞ր օր մի



Այժմ Տիրատուր վարդապետի հանելուկների մասին: Վերելում տեսանք, որ նրանք պահպանուել են երեք անտիպ ընդօրինակութիւններով: Բ. Սարգիսեանը իր նկարագրութեան մէջ, նշում է, որ Վենետիկի Թ. 244 ձեռագրում պահպանուած է քսան երկու հանելուկ (9):

Մաշտոցի անուան Մատենադարանի վերոյիշեալ երկու ձեռագրերից իւրաքանչիւրում Տիրատուր վարդապետի հանելուկների շարքը բաղկացած է ոչ թէ քսան երկու, այլ քսան չորս միաւորներից: Թւում է, թէ Վենետիկի ձեռագրում եւս սխալի երկու հանելուկներ լինեն, որոնց քանակը Բ. Սարգիսեանի հաշումների ժամանակ հաւանաբար շփոթուած է:

Մաշտոցի անուան Մատենադարանի Թ. 3531 ձեռագրում շարքի վերջում կան եւս երկու հանելուկներ, որոնք սակայն, խորթ են ընդհանուր շարքին: Ահա դրանք.

Հիւրն չկայ, տունն երեքի  
Ի իմքն է վըրան միասունի.  
Տանիսն կոկ՝ գերդ գալիկի,  
Առաստաղքն նման է քաղերթի:

Հայր իմ ծընաւ զիս ի մօրէ իմմէ,  
Եւ դուստր իմ ծնաւ գմայր հօր իմոյ՝  
Ի կնոջէ իմմէ:

Ինչպէս երեւում է, տուեալ ձեռագրի (Թ. 3531) գրիչն այդ հանելուկը դտել է իր ձեռքի տակ եղած հիմք-օրինակում եւ դիտել որպէս Տիրատուր վարդապետի ստեղծագործութիւն: Այլապէս նա դրանք կը զետեղէր հանելուկների յաջորդ շարքում, որ դրուած է «Այլուստ» խորագրի տակ:

Որ իսկապէս նշուած երկու հանելուկները խորթ են Տիրատուր վարդապետի շարքին, դա երեւում է ուրիշ ձեռագրերի մէջ

պակաս: Ասաց. Զի այսօր կերակուր ոչ կերա, ի քիւ չի անկաներ...» (Ն. եպս. Պողարեան, Մայր Յուցակ Ձեռագրաց Սրբոց Յակոբեանց, Դ. հտր., Երուսաղէմ, 1969, էջ 250): Հաւանաբար այդ իշխանը ժամանակին յայտնի Սիւնեաց Բուրթել իշխանն է, որովհետեւ սոյն գրոյցին մատուցող ու յաջորդող գրոյցները կապուած են մրա հետ, իսկ Տիրատուր վարդապետն էլ մոյն կողմերումն էր ապրում եւ գործում:

9. Բ. Սարգիսեան, նշ. աշխ., էջ 651:

պահպանուած տեղեկութիւններէն: Այսպէս, օրինակ, դրանցից առաջինը գտնուած է նաեւ Մաշտոցի անուան Մատենադարանի թ. թ. 9071, 5624, 8575, 695, 541, 3218, 1558, 7035, 7703 ձեռագրերում, որոնք բոլորն էլ կրում են Ներսէս Ծնորհալու անունը: Լոկ վերջին ձեռագրումն է որ հեղինակի անունը պակասում է, այն էլ շարքի սկիզբը եւ խորագիրը կորած լինելու պատճառով:

Ինչ վերաբերում է «Հայր իմ ծնաւ զիս...» հանելուկին, ապա դա խորթ է ոչ միայն Տիրատուր վարդապետի, այլեւ Ներսէս Ծնորհալու եւ առհասարակ նրա նմանութեամբ ստեղծագործած բոլոր հեղինակների հանելուկներին, որովհետեւ գրուած է ազատ բանաստեղծութեամբ: Իսկ այդպիսիները կազմում են մի այլ խումբ, չնայած Ներսէս Ծնորհալու հանելուկների շարքում եւս երբեմն հանդիպում ենք նրա հետեւեալ աւելի անաղարտ տարրերակին.

Հայր իմ ծընաւ զիս ի մօրէ իմմէ,  
Եւ ես ծնայ զմայր որդոյ իմոյ,  
Եւ որդիք իմ ծնամ զմայր հօր իմոյ (10):

Ուրիշ ձեռագրերում այս հանելուկը սկիզբ է հանդիսանում մի այլ լինջնատիպ շարքի (11), որ կոչուած է «Համելուկք դիմակք» եւ վերագրուած է Անանիա Շիրակացուն (12): Այս վերագրումը չնայած կարիք է դրում փաստարկման, սակայն, միւս վկայութիւնների հետ միասին, միանգամայն անհաւանական է դարձնում նշուած հանելուկը՝ Տիրատուր վարդապետի հանելուկների թուին դասելու հարցը:

Պէտք է ցաւով նշել, որ մեր ձեռքի տակ եղած վերոյիշեալ շարքերից եւ ոչ մէկում հրապարակուող հանելուկների պատասխանները չկան: Այդ բոլոր քսան չորս հանելուկներից մեզ յայտնի է լոկ երկուքի պատասխանը: Մէկի մասին նշեցինք վերեւում՝ օգտուելով «Բաղմամէսը» 1850 թուականի հրապարակումներից («Լուսին»): Միւս նմուշը՝ «Կայր քաջ մի այլ նրման սմին...» հանելուկն է, որից վերեւ թ. 5118 ձեռագրում գրուած է «Տրդատ»: Բ. Սարգիսեանի նկարագրութիւնից չի երեւում, արդեօք, Վենետիկեան ձե-

10. Ձեռ. թ. թ. 5624, 8575, 695, 8908 (վերջինը ոչ Ներսէս Ծնորհալու անուամբ, այլ՝ անանում):

11. Տես՝ Ձեռ. թ. թ. 1770, 6097, 573, 713:

12. Ա. Արքահամեան, Շիրակացու Մատենագրութիւնը, Երեւան, 1944, էջ 158-159:

ուսգրում պատասխանները կա՞ն, թէ ոչ: Եթէ չկան, հասցա ի՞նչ հիման վրայ է Ղ. Ալիշանը «Բաղմավէպ»ում տպել նաեւ հրատարակւող հանելուկի պատասխանը. ի՞նքն է դուշակել, թէ օգտուել է մեզ անյայտ աղբիւրից:

Ըստ երեւոյթին Մաշտոցի անուան Մատենադարանի թ. 3531 ձեռագրում հանելուկների պատասխանները ժամանակին յատուկ եղանակով նշուած են եղել, սակայն չեն պահպանուել: Այսպէս մտածելու հիմք են տալիս այդ ձեռագրում գտնուող շարքի միաւորներին ուղեկցող համարակալման թուատառերը: Դրանք սկսում են «ՄՏԶ»ից (256) եւ աւարտում «ՄՀԹ»ով (279) (13): Դրանցից առաջ եւ յետոյ առկայ են հանելուկների ուրիշ շարքեր, որոնք բոլորը միասին ընդգրկուած են մի ընդհանուր համարակալման մէջ: Նման դէպքերում այդ շարքերի ընդհանուր համարակալման համաձայն էլ կազմուած եւ կցուած է լինում պատասխանների ցանկ: Տուեալ ձեռագրում, սակայն, այդ ցանկը չի պահպանուել, որովհետեւ հանելուկների սկզբի մասի թերթերը, այդ ցանկով հանդերձ, կտրուած եւ հանուած են: Հաւանաբար նոյն հիմքից է նաեւ թ. 2961 (ԺԳ - ԺԴ. դարեր) ձեռագրի շարքը, որի սկիզբի մասը նոյնպէս կտրուած հանուած է, սակայն բարեբախտաբար, ցանկը պահպանուել է:

Մաշտոցի անուան Մատենադարանի վերոյիշեալ երկու ձեռագրերում պահպանուած շարքերը միանգամայն հարազատ են միմիանց եւ հնարաւորութիւն են տալիս կազմելու քննական ընդհանուր բնագիր: Տարընթերցումները սակաւադէպ են եւ առանձին բարդութիւններ չեն ստեղծում ոչ իմաստային ոչ էլ հեղինակային պատկանելիութեան առումով:

Ուշագիւր գննութիւնը ցոյց է տալիս, որ Տիրատուր վարդապետն իր հանելուկները, իրօք, զրեւ է ներսէս Ծնորհալու հետեւութեամբ: Այսպէս, օրինակ, բոլոր միաւորներն էլ շարադրուած են քառատողերով, բացի մի նմուշից, որը բաղկացած է վեց տողից: Տաղաչափութիւնը եւս նոյնն է՝ եամբական երկանդամ ութ վանկանի ոտանաւորը (4-4): Յանգաւորման եղանակը եւս հարազատ է ներսէս Ծնորհալու հանելուկների յանգաւորմանը: Երկու դէպքում էլ, որպէս կանոն, ամէն մի հանելուկ նոյնայանգ է (14): Լեզուն ու ո-

13. Աւելի միշտ՝ վերջիմ համարը «ՄՁԲ»ն է, բայց քանի որ վերջիմ 2 համելուկներն օտար են, ուստի ՄՁԱ եւ ՄՁԲ համելուկները միասին չունենք:

Գրիչն էլ մոռացել է «ՄՁ» համարը եւ մրա տեղ գրել է «ՄՁԱ»:

14. Տիրատուր վարդապետի համելուկներից մէկը («Գիտեմ մի այլ...») շարադրուած է երկու տեսակի յանգերով:

ձը նոյնպէս հոգեհարազատ են: Նոյնը կարելի է ասել նաեւ հանելուկների ընդգրկման հարցերի եւ առհասարակ շարադրման եղանակի մասին: Կան առանձին հանելուկներ, որոնք փաստօրէն գրուած են Ներսէս Շնորհալու որոշ հանելուկների թեմաներով: Յիշենք մի երկու օրինակ:

*Ներսէս Շնորհալու մօտ կարդում ենք.*

Մանուկ մի այլ ի յայս նրման  
էր ի յազգէն Արշակունեան.  
Հանչաք մանուկ էր ու իշխան,  
Դ՛ Եփրատ վազեաց քայլ մի լրման (15):

*Դրա համապատասխան Տիրատուր վարդապետը գրել է.*

Այն քաջին ի՞նչ ասեմ ես գով,  
Որ յաղթանդամ էր հասակով.  
Զինուք վազեց նա զԵփրատով  
Զֆսաներկու կանգնոյ չափով:

*Պօսքը Վարդապետի մասին է՝ վկայուած Մովսէս Պորենացու կողմից (16):*

Հետաքրքրական է, որ այս եղանակով, ինչպէս Ներսէս Շնորհալին, այնպէս էլ Տիրատուր վարդապետը գրել են մի քանի հանելուկներ Մովսէս Պորենացու նկարագրած տարբեր հերոսների վերաբերեալ:

Հրատարակութեան ներկայացնելով Տիրատուր վարդապետի հանելուկները, յոյս ունենք, որ նրա նկատմամբ աստիճանաբար կը ստեղծուի որոշ ուշադրութիւն եւ հրապարակ կը հանուեն նոր հետազօտութիւններ՝ նուիրուած նրա մանկավարժական եւ մատենագիտական գործունէութեանը:

15. Ներսէս Շնորհալի, *Բանք Չափաւ*, Վեներտիկ, 1928, էջ 637:

16. Մովսէս Խորենացի, *Պատմութիւն Հայոց*, Տփղիս, 1913, էջ 308:

**ՏԻԵԶԵՐԱԼՈՅՍ ՎԱՐԴԱՊԵՏԻՆ**

**ՏԻՐԱՏՐՈՅ ԱՍՍՅԵԱԼ ՀԱՆԵԼՈՒԿՔ ԻՄԱՍՏԱՍԻՐԱԿԱՆՔ**

Ինքն է միայն 'ւ ընկեր չունի :  
 Իւր գոյութիւնն յոյժ հրաշալի,  
 Ըստ հնգից ի վեր 'ւ ի վայր շարժի  
 Եւ ըստ երկուց հաւասարի :

5 Զգալեացս ամէնն է պիտանի,  
 Իւրաքանչիւր որքան տանի .  
 Բայց հակընդդէմ սոցա լինի,  
 Տեսակն յառաջ քան զմիւքն կազմի :

Մերձ լինելով զիս սպանանէ,  
 10 Հեռի կալով զշունչըս քաղէ .  
 Յէակֆս ամէն ինքն մերձ է,  
 Աստուածութեանն յոյժ նշման է :

Մարդիկ յինքն յոյժ համարձակին,  
 Գազանք լոտն եւ դադարին .

**ԱՂԻԻՐՆԵՐ**

A ԶԼճ. Թ. 5118, ԹԵՐԹ 380բ-381, ժամանակ՝ 1412 թ. :

B ԶԼճ. Թ. 3531, ԹԵՐԹ 253ա-254բ, ժամանակ՝ 1670 թ. :

C Բ. Սարգիսեան, *Մայր Յուշակ Հայերէն Զեռադրաց Մատենադարանին Մտիթարեանց Ի Վեհեակի*, Բ. հտք., 1924, էջ 651: ժամանակ՝ ԺԳ-ԺԴ. դդ. :

**ԽՈՐԱԳԻՐ**

A Տիեզերալոյս վարդապետին Տիրաս արարեալ հանհամ :

B Տիրասուր վարդապետի ասացեալ (այսքան) :

C Տիեզերալոյս վարդապետին Տիր [ատրոյ] ասացեալ հանելուկի իմաստ :

**ԲՆԱԳԻՐ**

2 A Իր գոյութիւնն :

3 ու ի վայր :

B ւ չիք :

5 Ագալեաց է չիք :

Զգալեաց :

C Զիք շարունակութիւն :

7 հակառակ ընդդէմ :

8 զմիւք :

11 ամէնն :

յինքն :

13

Մարդիկք :

14

դադարեմ :

15 Արուեստքն ամէն նովաւ լինին,  
Եւ հոմանուն է ինք Փրկչին:

Հինքն ասացին զինք՝ մեզ նման,  
Եւ ինքն ունի երկու բերան.  
Բազում իրաց է նա նշան,  
20 Կու մեռանի եւ է՛ կենդան:

Տնտեսք երեք են կենդանոյն,  
Կենդանութեան մընալ ի նոյն.  
Պատմաւ ջերմին եւ քանալուն,  
Ջլով կապող զշաղկապ օդոյն:

25 Բան մի գարմացք ի մեզ լինի,  
Բայց անվարժիցն անգիտելի.  
Ջի նոխութեամբքն նուագի  
Եւ նուագութեամբքն նոխ լինի:

Ոմանք ստեղծան մաքուր հոգի,  
29 Կէտք գոյացան զուտ զգալի.  
Ի մէջ սոցա մին կենդանի,  
Որ գերկոցունց յինքեան ունի:

Պարգեւս էառ սա յատկագոյն,  
Որ երկոցունց է գերագոյն.  
35 Հոգոյն տվաւ վասն մարմնոյն,  
Մարմինն էառ վասն հոգոյն:

է արարիչ՝ և աստուած չէ նա,  
Արեստաւոր ու սարված չունի նա.  
Ինքն ի յամէն էակքս կա  
40 Եւ է անտես՝ և ի յայտ չգա:

17

Հինք:

23 ջերմին...ն (եղծուած է):

24 շաղկապ:

30 գոյտ փխ. զուտ:

սգալի:

38 սարված չուննա:

39 էակքս:

է գգալի եւ չերեւի ,  
 Զէ կենդանի ու կու խօսի .  
 Թէ ոք ընդդէմ նորա խօսի՝  
 Զնոյնն առնէ պատասխանի :

45 Է քիւ բոլոր քառանկիւնի ,  
 Ինքն ի յինքեան շրջապատի .  
 Երկու տեսակ յինքեան ունի ,  
 Մինն ի միոյն ոչ շփոթի ,  
 Եւ է պայման լուսոյ լուսնի  
 50 Եւ պաշտաման քահանայի :

Այն քաջին ի՞նչ ասեմ ես գով ,  
 Որ յաղթանդամ էր հասակով .  
 Զինուք վազեց նա գեփրատով՝  
 Զքսաներկու կանգնոյ չափով :

55 Կայր քաջ մի այլ նման սմին ,  
 Որ յԵլլադա ի կրկեսին  
 Թափեաց գեղջիւր երկու ցըլին  
 Եւ գարմացումն հանդիսին :

Գիտեմ քաջ մ այլ նախնի սոցին ,  
 60 Որ ի Պոնդոս յեզր ի ծովին  
 Զմխեալ նիգակն իւր գերկսայրին  
 Ի խոր նստոյց յորձաքարին :

41 սգալի :

45 քառանկիւնի :

49 լուսնոյ լուսին :

51 ես չիք :

54 գ իթ :

ունի պատասխան՝ «Տրդատ»,

որ վերաբերում է հաւա-

նաբար յաջորդ համելու-

կին (55-58րդ տողեր) :

56 կրկեսին :

կրկեսին :

57 Բ ցեվին փխ. երկու ցըլին :

60 յեզր ծովին :

Ոմն էր յագգէ Արշակունի,  
 Մայրն վաւաշ եւ խիստ մոլի .  
 65 Տեսումն աչացն էր անբարի,  
 Հանց որ յաղբէր որձաբարի :

Արք երեք են հրաշալիք,  
 Որք եւ բազմաց են ցանկալիք,  
 Որոց խօսել են ամուսինք  
 70 Յեզր ջրոյն, յոր փափաքեն կենդանիք :

Խորհուրդ չորրորդն յոյժ սոսկալի,  
 Որ յաստուծոյ հօրէ շարժի .  
 Եկեալ յեզրէ արեւդանի  
 Հարսնխօսի գեկեղեցի :

75 Յերիս ծընունդս է պատուած,  
 Յոբունց բազմաց գերազանցած,  
 Ի ջրոյ, ի հրոյ եւ ի վիմաց,  
 Թո՛ղ գառաջինն, որ ի ծնողաց :

Գիտեմ մի այլ յոյժ գերազանց,  
 80 Ծնընդեամբ երեք է մեծարած,  
 Շնորհօք յերկնէ եւ ի կուսէ  
 Եւ ըստ բնութեանն, որ ի մօրէ :

Վեհին մեծի էր նըմանող,  
 Զարմանալեաց հրաշագործող .  
 85 Հրոյ եւ ջրոյ էր արգելող,  
 Վիմաց նըման ջրրի հոսող :

- 
- 69 խօսել :  
 71 ցանկալի փխ. սոսկալի :  
 72 հուրէ փխ. հօրէ :  
 73 ի յեզրէ :  
 76 Յոգունց :                      գերազանցաց :  
 77 Ի ջրոյ, հրոյ :  
 82 բնութեան և որ :  
 86 հոգող :



Զընքացս երկնից դադարեցոյց  
 Ի ցոյց վիրացն, որ ողջացոյց,  
 Զակն տուրնջեան յետըս դարձոյց,  
 90 Զչափ աւուրն մեծացոյց :

Ում մարգարէն երեսն ճան՝  
 Յամի ծնաւ նա մետասան .  
 Թէպէտ գործովք էր անպատկան,  
 Բայց ծնունդն սուրբ եւ պատուական :

95 Զմարգարէն սուրբ տեսանող  
 Նախաձայնեաց ազգին սպանող .  
 Նա իւր ազինն հղել դաւող,  
 Յետ իւրն եթող բազում կոծող :

---

91 Ըզչափաւորըն :

92 մեծ տասան :

93 Ե օրինակն ունի եւս երկու տուն, որոնք Տիրատուր վարդապետինը չեն (տես վերելում) :

## TIRATOUR VARDABET AND HIS RIDDLES

A. SH. MENADZAKANIAN

(Summary)

The roots of Armenian riddles are part of Armenian folklore. The greatest developer of riddles in the Armenian literature was Nerces Shnorhali, the 12th century poet, in whose steps and imitation Armenian poets of the following centuries wrote new riddles. One of the followers of N. Shnorhali was 13-14th century author and head master of Glatzor-Hermon monastery-school Tiratour Vardabet, whose riddles are brought into light by the author of the article and are published for the first time.